

**Uunga siunnersuut: Oqaatsuni oqaluffiliornissaq siunertaralugu sanaartornissamut pilersaarummik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

*(Inatsisartunut ilaasortaq Doris Jakobsen Jensen, Siumut)*

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**Siunnersuutip aappassaanerqarnerani**

**ISUMALIUTISSIISUTAA**

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Doris Jakobsen Jensen, Siumut, Siulittaasoq  
Inatsisartunut ilaasortaq Nivi Olsen, Demokraatit, Siulittaasup tullia  
Inatsisartunut ilaasortaq Adam Kristensen, Inuit Ataqatigiit, sinniisoq  
Inatsisartunut ilaasortaq Dines Mikaelson, Siumut  
Inatsisartunut ilaasortaq Mariia Simonsen, Inuit Ataqatigiit

UPA2022-mi 12. maj 2022 siullermeerinninnerup kingorna siunnersuut ataatsimiititaliap misissorpaa.

**1. Siunnersuutip imarisaa siunertaalu**

Siunnersuummi matumani Oqaatsuni oqaluffiliornissamut sanaartornissamut pilersaarut aallartisaqqullugit Naalakkersuisut peqquneqarnissaat siunertaavoq. Nunaqarfimmi oqaluffiliornissaq ungasinnerusoq eqqarsaatigalugu siunertaavoq.

**2. Apeqqutit**

Immikkoortumik suliaqarnermut atatillugu Ilinniartitaanermut, Kultureqarnermut, Timersornermut Ilageeqarnermullu Naalakkersuisoq ataatsimiititaliamit apeqqutinut assigiinngitsunut akissuteqaqqullugu qinnuigineqarpoq. Ataatsimiititaliap Naalakkersuisumut apeqqutaasa Naalakkersuisullu akissutaasa assilineqarneri isumaliutissiissummut uunga ilanngussatut kakkiupput.

**3. Siunnersuummik ataatsimiititaliap suliarinninnera**

Siunnersuutip siullermeerneqarnerani inimik naalagiarfiusinnaasumik upperisamullu attuumassuteqartunik iliuseqarfiusinnaasumik peqarnissap pingaaruteqarnera amerlanerusunit isumaqatigiissutaavoq. Naalakkersuisut akissuteqaammi siunnersuuteqartup

siunnersuutip tunngavilersuinermini illu oqaatigisaa atuarfik naalagiarfiusinnaasoq pineqarsimassasoq ataatsimiititaliap maluginiarppaa.

Ilageeqarneq<sup>1</sup> pillugu Inatsisartut inatsisaat nr. 9, 19. maj 2010-meersumi §20 imm. 1 aamma imm. 2 naapertorlugu init pineqartut aserfallatsaaliorneqarnissaannut aaqqissorneqarnissaanullu pisussaaffik Naalakkersuisuniingilaq.

Oqaatsuni oqaluffiliornissamik pilersaarusiornissamik siunnersuummik suliaqarnissaq pineqartoq atuarfimmillu naalagiarfiusinnaasumik aaqqissuinissamik sammiveqanngitsoq ataatsimiititaliap tikkuassavaa.

Ilageeqarneq<sup>2</sup> pillugu inatsimmi § 21 naapertorlugu oqaluffiliorniarnerni ilagiit sinniisaat provstimut saqqummiussisassasut ataatsimiititaliap oqaatigissavaa. Biskopimut Naalakkersuisunullu siunnersuutigineqartoq tamatuma kingorna saqqummiunneqassaaq.

Tamanna tunngavigalugu Naalakkersuisut akuliunneqannginneranni ilagiinni oqaluserineqarsimassasoq oqaluffiliorniarnerni suleriaatsini malinninnissamik Naalakkersuisunit kissaateqarneq akissuteqaammi allaaserineqartoq ataatsimiititaliap isiginiarpaa.

### 3.1. Naalakkersuisunit allannguutissatut siunnersuut

Siunnersuutip siullermeerneqarnerani Naalakkersuisut ima allannguutissatut siunnersuuteqarput:

**Inatsisartut aalajangiiffigisassaattut siunnersuut Naalakkersuisut Ilagiit suleqatigalugit immikkoortumut pilersaarummik suliaqaqqullugit peqquneqarnissaannik, tassanilu nutaanik sanaartornissamut iluarsaanissamullu pisariaqartitsinerit Ilagiit suliaasaqarfianniittut qulaajaavigineqassasut.**

Naalakkersuisut allannguutissatut siunnersuuteqarnerminni oqaluffeqarneq tamakkiinerusok tulleriarnerminni salliutimassuk ataatsimiititaliap qujassutigaa maluginiarlugulu siunnersuutip siullermeerneqarnerani Naalakkersuisut allannguutissatut siunnersuutaat isumaqatigineqarluni tusaaniarneqartoq.

---

<sup>1</sup> § 20. Ilagiit sinniisaasa palaseqarfimmi oqaluffiit illutaat toqusullu inaat aalajangersakkat Naalakkersuisunit aalajangersarneqartut malillugit nakkutigissavaat. Taakku isumannaatsumik aserfallatsaalinnissaat provstip isumagissavaa.

Imm. 2. Init naalagiartarfittut atorneqartut (atuarfiit naalagiartarfiutitigisut) nakkutigineqarnerat kommuniip ataatsimiititaliaa susassaartoq suleqatigalugu pissaaq.

<sup>2</sup> § 21. Ilagiit sinniisaasa oqaluffinnik toqusullu inaannik sananissamut, aaqqissornissaannut, aserfallatsaaliorneqarnissaannut pinnersarnissaannullu kiisalu init naalagiartarfittut atorneqartut (atuarfiit naalagiartarfiutitigisut) aaqqissornissaannut pinnersarnissaannullu siunnersuutit provstimut saqqummiutissavaat.

Imm. 2. Siunnersuutit ilagiit sinniisaasa saqqummiussaataat taakku piumasaqarneratigut Biskoppimut Naalakkersuisunullu saqqummiunneqassapput.

Siunnersuutigineqaqqaartumit allannguutissatut siunnersuut imarisamigut assigiinnngissuteqartoq ataatsimiititaliap paasivaa. Tamanna tunngavigalugu allannguutissatut siunnersuutip allannguisuunnnginnissamik piumasaqaataasumik naammassinninnginnera ataatsimiititaliap maluginiarpaa. Aalajangiiffigisassatut siunnersuummut allannguutissatut siunnersuummik siunnersuutaqqaartumi siunertanik ima allannguitigisumik allaat pissutsit piviusut malillugit siunnersuut nutaarluinnaq pineqalersillugu saqqummiussineq, ilusiliinissamut piumasaqaatit naapertorlugit ajornarpoq. Allannguutissatut siunnersuut taamaattoq saqqummiunneqaruni akuersissutigineqarlunilu Naalakkersuisunut pituttuisuunaviangilaq.

Taamaakkaluartorli allannguutissatut siunnersuut Inatsisartuni akuerineqassagaluarpaa Naalakkersuisut allannguutissatut siunnersuut piviusunngortinniarat ataatsimiititaliap isumaqarpoq.

Naalakkersuisut ilageeqarnermi iluarsartariaqakkanik pisariaqartitsinermik qulaajaassasut nutaanillu sanaartortariaqartunik pisariaqartitsiviusunik misissuissasut allannguutissatut siunnersuutip akuerineqarneratigut inernerussasut ataatsimiititaliap aamma paasivaa.

Oqaluffeqarnerup iluani sulianut pilersarusiornissamik 2018-103-mut Naalakkersuisut akissuteqaamminni 2018 -imi aallartitsisoqarnissaa eqqarsaatigineqartoq § 37 naapertorlugu apeqqummut allaaserisaqartut ataatsimiititaliap maluginiarpaa.

Oqaluffeqarnerup iluani siunissami iluarsaassinissamik pilersaarutitik imaqartussatut taaneqarpoq. Naalakkersuinikkut tulleriiaarinerit patsisigalugit suliaq Naalakkersuisut akissuteqaataat tunngavigalugu aallaartinneqanngisaannarsimasoq ataatsimiititaliap maluginiarpaa.

§ 37 naapertorlugu apeqqut 2018-103-mut akissuteqaammi oqaluffiit qanoq issusaannik 2016-imili oqaluffeqarnerup iluani iluarsaassinissamik assigisaanillu pisariaqartitsinermik nalunaarsuisoqarmalli uninngasoqarsimasoq ataatsimiititaliap paasivaa.

Oqaluffeqarnerup iluani sanaartornissat aaqqissugassanillu suliat pillugit nunap immikkoortuani pilersaarummik suliaqarnissaq 250.000 kr-inik AC fuldmægtigimut ukiup affaanut akissarsiaritinneqartutut naleqartinneqartoq Naalakkersuisut akissuteqaammi allappaat.

Oqaluffeqarnerup iluani nunap immikkoortuini pilersaarummi sanaartornermik aaqqissugassanillu pisariaqartitsinermik sammisaqarfiusup suliarilluagaanissaa ataatsimiititaliap naqissusissavaa, Nunap immikkoortuini pilersaarummut aningaasartuutissatut naatsorsuutigisat aningaasaliissutigisat iluanni matussuserneqarsinnaanersut ataatsimiititaliap qularisinnaavaa. Taamaattumik suliamut aningaasaliissutaasussat pisariaqartut immikkoortinnissaata pingaaruteqarnera ataatsimiititaliap naqissusissavaa.

2023-p qiteqqunnerani oqaluffiit pillugit suliamik pilersaarusiornissaq naammassisussat naatsorsuutigineqartoq ataatsimiititaliap apeqquteqaataanut Naalakkersuisut akissuteqarput.

#### **4. Siunnersuutip aningaasatigut kingunerisassai**

Inatsisartut Suleriaasianni § 33 imm. 1-imi allassimavoq siunnersuutip piviusunngortinneqarnissaanut aningaasatigut allaffissornikkullu kingunerisassai siunnersuutip tunngavilersuutaani allaaserineqassasut.

Siunnersuutip piviusunngortinnissaanut aningaasatigut kingunerisassai allaaserineqassasut ataatsimiititaliap maluginiarpaa. Oqaatsuni oqaluffiliornissami pilersaarusiornissamut aningaasartuutissat 750.000 kr. missaaniissasut taamaalilluni siunnersuuteqartup naatsorsuutigaa.

#### **5. Ataatsimiititaliap inassuteqaataa**

Naalakkersuisut allannguutissatut siunnersuutaat akuersissutigineqassasoq ataatsimiititaliap isumaqatigiittup inassutigaa.


Tassunga tunngatillugu ataatsimiititaliaq ima oqaaseqaateqassaaq:

Oqaluffeqarnermi suliamut pilersaarutip salliutinneqarnissaa ataatsimiititaliamut pingaaruteqarpoq. Ataatsimiititaliap apeqquteqaataanut Naalakkersuisut akissuteqaatiminni nammineq suliamik pilersaarutip naammassereernissamik killilikkaminnut naammassinnereersimanissaat aamma suliap pingaartut Naalakkersuisunit nalilersorneqassasoq ataatsimiititaliap naatsorsuutigaa. Taamaattumik suliamut pilersaarut naammassineqareerpat ilisimatinneqarnissartik ataatsimiititaliap kissaatigaa oqaluffeqarnermilu suliat qanimut malinnaavigissallugit.


Taamatut oqaaseqarluni isumaliutissiissummilu allassimasutut paasinnillutik matumuuna siunnersuut ataatsimiititaliap aappassaaniigassanngortippaa.




Doris Jakobsen Jensen  
Siulittaasoq



Nivi Olsen  
Siulittaasup tullia



Adam Kristensen



Dines Mikaelen



Mariia Simonsen



Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliaq

**Pillugu: UPA 2022/105 pillugu allakkatigut Oqaatsuni nutaamik oqaluffiliornissaq siunertaralugu sanaartornissamut pilersaarummik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

27-05-2022  
Suliap normua. 2022 - 6779  
All. nr. 20257643

Postboks 1029  
3900 Nuuk  
Oqarasuaat: +299 34 50 00  
Email: ikin@nаноq.gl  
www.nanoq.gl

**Apeqqt 1: Kalaallit Nunaanni oqaluffinnik sanaartornissamik iluarsaassinissamillu pilersaarummik suliaqarnerup qanoq siviutiginissaa Naalakkersuisut naatsorsuutigaat?**

**Akissut:** Oqaluffinnut immikkoortortanut pilersaarut oqaluffiit qanoq pitsaassuseqarnerat aallaavigalugit suliarineqartarpoq. Naalakkersuisut oqaluffinnut immikkoortortanut pilersaarut 2023-p qeqqani naammassissallugu naatsorsuutigaat.

**Apeqqt 2: Naalakkersuisut § 37 naapertorlugu apeqquteqaammut 2018/103-mut akissuteqaammini ima allapput: ” Taassuma saniatigut ilageeqarnermut tunngatillugu immikkoortunut pilersaarusiap siunissami iluarsartuussinissamut pilersaarutininik imaqtartussap 2018-imi aallartinneqarnissaa ilageeqarnermut Naalakkersuisoqarfimmit eqqarsaatigineqarpoq.” 2018-imi pilersaarutininut aallartinneqartussaasunut suliat killiffii pillugit Naalakkersuisut nassuiaateqassasut kissaatigineqarpoq.**

**Akissut:** 2018-imi Oqaluffinnut Immikkoortortanut pilersaarut eqqarsaatigineqartoq politikkikkut pingaarnersiunerit allat peqqutaallutik aallartinneqanngilaq.

**Apeqqt 3: § 37 naapertorlugu apeqquteqaammut akissuteqaammi Oqaatsut oqaluffiata qaliamut ussiitsumut iluarsartuussineq qalipaanermullu 2018-imi suliarineqartunut Naalakkersuisut nassuiaanissaat kissaatigineqarpoq.**

**Akissut:** Iluarsartuunnera qalipanneralu isumagineqareerput.

**Apeqqt 4: Immikkoortup UPA22/105-ip siullermeerneqarnerani Naalakkersuisut akissuteqaamiinni Oqaatsuni oqaluffik taavaat oqaluffik atuartitsiviusartoq § 37 naapertorlugu apeqquteqaammut akissuteqaammi Naalakkersuisut illu pineqartoq**

**oqaluffittut taallugu. Oqaatsuini oqaluffik oqaluffittut taaneqassanersoq imaluunniit oqaluffik atuartitsiviusartutut taaneqassanersoq nassuiaateqassasut kissaataavoq.**

**Akissut:** 2018-103-mut tunngatillugu § 37 tunngavigalugu apeqqutigineqarpoq "Naalakkersuisut nunatsinni oqaluffiit iluarsartuunnissaannut qanoq pilersaaruteqarpat?". Naalakkersuisut "oqaluffinnut" taaguut apeqquteqartumit atorneqarsimasoq malillugu assinganik akisimavoq. Oqaatsuni illumut pineqartumut taaguutaasusaaq tassaavoq oqaluffik atuarfiusartog.

Inussiarnersumik inuulluaqqusillunga



Peter Olsen  
Naalakkersuisoq